



Stil pasin stap insait tru

WANPELA lida man i tokaut nau olsem Fainens Dipatmen i gat ol pasin hait na paul pasin i stap we planti bikpela mani bilong Papua Niugini i wok long go aut long han bilong ol man nabaut. Dispela kain pasin em yumi save kolim **KORAPSEN**.

Dispela opis o Fainens Dipatmen i save lukautim mani bilong Papua Niugini. Ol tasol i save holim olgeta rekot na mekim olgeta pepa wok bilong mani i kam na mani i go aut. Sapos ol i save hait na mekim pepa o sek na givim aut long ol giaman wok na kontrak nabaut, em nau dispela i soim olsem olgeta gavman opis tu i gat wankain pasin i stap.

Wanpela fainens opis a tokim mi olsem dispela pasin em tru tasol ol arapela opis a hat long tokaut bikos ol i save mekim pepa wok na ol i klia



olsem sampela kleim o pepa bilong askim long kisim mani i no stret. Olgeta projek pepa i save kam long ol eksen opisa na ol i save lukim na skelim wantaim gaidlain buk bilong ol. Dispela gaidlain buk i save soim klia wanem kain projek o kleim em i stret na i bihainim rot bilong Pablik Fainens Lo. Tasol sapos ol eksen opisa i lukim wanpela pepa-we i no stret bihainim dispela Lo bilong Fainens, ol i save pulim win na mekim tasol. Bikos antap long ol dispela pepa i save gat sampela hap toksave bilong bikbos i stap long en. Kain toksave olsem, "mekim dispela pepa wok hariap, stretim dispela

kleim i go long dispela baset, dispela kleim em longtaim kleim olsem na stretim nau, Minista i laikim dispela pepa wok hariap nau tasol, na planti arapela kain hap toktok bilong bikbos. Dispela i save mekim ol na ol junia opisa i save go het tasol. Taim akaunten i raitim sek bai yu no inap save long wanem taim sek i go aut o husat tru i kam na kisim sek.

Em nau yumi harim olsem memba bilong Anglimp Saut Wagi Jamie Maxtone Graham i kamautim rekot bilong planti milien kina i lus pinis. Planti i kam olsem kot oda tasol Rejistra bilong kot i tok dispela pepa i no trupela kot oda pepa. Em nau yumi bai tok wanem, ol opisa bilong Fainens yet i save long amas mani i stap long pasbuk na amas mani i hangamap nating wetim ol wok na projek long go long en. Sampela taim planti mani i

kam bek long Fainens opis bikos projek i no pinisim o yusim dispela mani. Olsem na ol opisa yet i save olsem kain mani olsem i hangamap raun olsem i stap.

Yu traim raun long sampela bikpela hotel long Mosbi na lukim. Bai ol Fainens opis a bilong ol gavman dipatmen bai sanap pilai poka mesin o dring na kaikai long hotel i stap olsem ol bisnismen. Na lukim gut husat bai ol i dring na stori wantaim. Bai ting olsem olgeta em ol wanwok tasol o em ol bikman bilong gavman i bung long kisim win. Tasol bikpela bisnis i save ron long dispela taim. Ol i tromoi tok pisin i go i kam na samting i kamap pinis.

Wanpela hap tok i stap olsem, "Yu sikirapim beksait bilong mi bai mi sikirapim bilong yu".